

# Lawatan PM ke negara Teluk eratkan persaudaraan

**KUALA LUMPUR, Khamis** — Lawatan Datuk Seri Dr. Mahathir Mohamad ke negara-negara Teluk dan ke Jeddah mulai Sabtu ini dijangka akan mengeratkan lagi ikatan persaudaraan Islam antara Malaysia dengan negara-negara tersebut.

Lawatan lapan hari itu yang pertama oleh Perdana Menteri ke negara-negara luar rantau Asean, membuktikan betapa pentingnya Malaysia meletakkan hubungannya dengan negara-negara Islam.

Sebagai sebuah negara Islam dan anggota Pertubuhan Persidangan Islam (OIC), lawatan Datuk Seri Dr. Mahathir ini dapat dilihat sebagai usaha Malaysia membuktikan dan melaksanakan dasar hubungan luar negerinya yang memertingkatkan negara-negara anggota Pertubuhan Islam.

Lawatan tersebut pasti akan mengorak ke arah memperkukuh lagi ikatan ummah antara negara-negara Islam.

Negara-negara Teluk yang akan dilawati oleh Datuk Seri Dr. Mahathir ialah Bahrain, Emiriyah Arab Bersatu dan Oman dan di negara-negara ini kelak perbincangan-perbincangan bagi mengeratkan hubungan mesra yang sedia wujud akan diadakan.

Perbincangan akan meliputi berbagai bidang kerjasama termasuk

ekonomi, perdagangan dan yang terpenting kerjasama di bidang agama.

Sebagai usaha mengeratkan lagi hubungan Malaysia dengan negara-negara tersebut, Datuk Seri Dr. Mahathir dijangka akan mempelawa negara-negara itu turut menyertai usaha-usaha pembangunan negara ini.

Negara-negara Teluk itu, yang kaya dengan hasil minyak, juga dijangka akan diundang membantu Malaysia menjayakan hasratnya menerokai bidang industri berat menerusi penyertaan ekuiti.

Kepada umat Islam di Malaysia, negara-negara Teluk dan juga Arab Saudi dapat dijadikan contoh yang amat baik tentang bagaimana negara-negara Islam yang dianggap konservatif dapat mencapai kemajuan dan permodenan tanpa menjejaskan syiar Islam dan kedudukannya.

Negara-negara ini telah membuktikan Islam tidak menghalang kemajuan dan permodenan malah keduanya dapat bergerak berganding bahu dan seiringan ke arah memperbaiki dan meningkatkan taraf sosio-ekonomi umat.

Bahrain, sebagai contoh, terkenal sebagai pusat antarabangsa bagi kegiatan urusan bank 'offshore' dan ia membuktikan bahawa kegiatan-kegiatan ekonomi moden tidak bercanggah dan tidak memudaratkan Islam dan umatnya.